



Sumáriu Kazu
Tribunál Distritál Baukau
Setembru 2020

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 16

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b) (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	8
Artigu 154 KP	Maus-tratus ba kónjuje	5
Artigu 146(c) KP no artigu 20 (1), artigu 2 nú (2 alinea f) Lei Nú. 5/2017	Ofensa ba integridade física grave no arma brankas	1
Artigu 138 KP, artigu 32, konjuga ho Artigu 20 (1) no (2) Lei Nú. 5/2017	Omisídiu simples forma tentada no arma brankas	1
Artigu 177 (1) KP no artigu 182 alinea 1(a no d) KP	Abuzu seksuál ba menór ho agravasaun	1
Totál		16

2. Totál desizaun ne'ebé JSMP monitoriza : 6

Tipu desizaun	Artgu sira	Númeru
Suspensaun ba prizaun nia ezekusaun	Artigu 68 KP	4
Pena multa	Artigu 67 KP	2
Totál		6

3. Totál kazu ne'ebé sei kontinua prosesu tuir JSMP nia monitorizasaun:10

B. Deskripsaun sumáriu ba desizaun kazu sira ne'ebé JSMP monitoriza:

1. Krime maus-tratus ba kónjuje

Nú. Prosesu : 0014/19. VQWTL
Kompozisaun Tribunál : Koletivu
Juis : Dr. José António de Jesus Escurial da Silva Faria, Dr. José Gonçalves no Dra. Maria Modesta de Almeida Viera
Prokuradór : Dr. Julio Correia da Silva
Defeza : Dr. José Maria Caetano Guterres
Desizaun : Pena prizaun tinan 2 suspende ba tinan 2

Iha 16 Setembru 2020, Tribunál Distritál Baukau prezide julgamentu leitura akordaun ba krime maus-tratus ba kónjuje ne'ebé envolve arguidu MdS hasoru nia feen, iha Distritu Vikeke.

Akuzasaun Prokuradór

Prokuradór akuza katak iha Juñu 2019, iha oras tuku 17:00 lokraik, arguidu ho lezada diskute malu kona-ba osan ne'ebé lezada uza ba nesesidade uma laran nian. Iha diskute malu ne'e, arguidu foti bikan no tuda iha lezada nia liman parte karuk. Depoisde akontesimentu ne'e, lezada atu ba hato'o kedas keisa iha polisia, maibé arguidu ameasa lezada dehan "*se ó ba hato'o keisa hau sei sona mate ó*".

Tuir mai iha 14 Jullu 2019, oras tuku 13:00 meiodia, arguidu foin fila husi serbisu no lezada mós foin fila husi kursu ingles iha Ailembata. Bainhira arguidu haree sira nia fahi mate, arguidu hirus no trata lezada, tuku dala rua iha lezada nia kanotak no tuku dala rua iha kabun.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu nega faktu sira no deklara katak iha akontesimentu primeiru bainhira arguidu han hela, lezada ko'alia barak no trata arguidu nune'e arguidu foti bikan no tuda lezada maibé la kona. Aleinde ne'e, arguidu mós la ko'alia dehan atu sona lezada. Enkuantu akontesimentu segundu, arguidu konfesa faktu sira no deklara katak arguidu ho lezada diskute malu tanba sira nia fahi mate no lezada mós foin fila husi tasi Ailembata la'os fila husi kursu ingles.

Arguidu hatutan katak foin primeiravés baku lezada, arrepende ninia hahalok no liu tiha semana rua mak arguidu ho lezada di'ak malu perante familia rua. Aleinde ne'e, arguidu mós hateten katak sira moris hamutuk desde tinan 2011 no iha oan na'in rua.

Enkuantu lezada deklara katak iha akontesimentu primeiru, sira diskute malu kona-ba nesesidade uma laran nian no arguidu foti bikan no tuda lezada maibé la kona no kona fali iha kadeira ne'ebé lezada tuur ba no bikan nia rahun mak kona lezada nia liman.

Lezada mós konfirma arguidu nia deklarasaun katak arguidu la ameasa atu sona lezada. Kona-ba akontesimentu segundu, lezada kontinua konfirma faktu sira iha akuzasaun no konfirma mós ho arguidu nia deklarasaun katak liu tiha semana rua, sira di'ak malu perante família rua to'o agora.

Alegasaun finál

Prokuradór haktuir katak arguidu konfesa parsialmente ba faktu sira. Maski nune'e tuir loloos arguidu mak tenke fó seguransa ba lezada nu'udar nia feen maibé pelu kontráriu arguidu mak komete fali agresaun hasoru lezada. Arguidu nia aktu ne'e priense elementu krime maus-tratus ba kónjuje mezmú sira di'ak malu ona. Bazeia ba lezada nia konfirmasaun, prokuradór intende katak akuzasaun prosedente no provadu. Ho konsiderasaun sira ne'e, husu ba tribunál atu kondena arguidu ho pena prizaun tinan rua suspende ba tinan rua.

Enkuantu defeza haktuir katak preziza konsidera mós arguidu nia deklarasaun iha produsaun ba prova sira hanesan sira di'ak malu perante família, husu ona deskulpa ba lezada, foin primeiravés mai hatan iha tribunál no arrepende ona ninia hahalok. Tanba ne'e, husu ba tribunál atu fó justisa ne'ebé justu ba arguidu.

Desizaun

Depoisde avalia faktu sira hotu, tribunál prova katak arguidu foti bikan no tuda lezada maibé la kona. Bikan refere kona fali iha kadeira no bikan nia rahun mak kona lezada nia liman. Tribunál mós prova katak arguidu tuku dala rua iha lezada nia kanotak no tuku dala rua iha kabun. Tribunál tetu mós sirkunstánsia atenuante sira hanesan arguidu konfesa, arrepende ona ninia hahalok, foin primeiravés mai hatan iha tribunál no di'ak malu ona ho lezada. Bazeia ba prova sira no sirkunstánsia hirak ne'e, tribunál kondena arguidu ho pena prizaun tinan rua suspende ba tinan rua.

2. Krime ofensa ba integridade fízika simples ho natureza violénsia doméstika

Nú. Prosesu : 0069/19. MNMNT
Kompozisaun Tribunál : Singulár
Juis : Dr. José Quintão Soares Celestino
Prokuradór : Dr. Ambrosio Rangel Freitas
Defeza : Dr. Sidonio Maria Sarmiento
Desizaun : Pena prizaun fulan 6 suspende ba tinan 1

Iha 25 Setembru 2020, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MSM hasoru nia feen segundu, iha Distritu Manatuto.

Akuzasaun Prokuradór

Prokuradór akuza katak iha 21 Dezembru 2019, iha oras tuku 21:00 kalan, lezada soe-lia (piadas) ba arguidu nia feen primeiru. Ho nune'e, arguidu basa dala rua iha lezada nia kanuruk, tebe dala rua iha kotuk laran no tolok lezada inklui koa'lia ba lezada "*se mak bolu ó mai*".

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa parsialmente katak basa dala ida iha lezada nia hasan parte karuk. Entretantu tebe no tolok, arguidu deklara katak la halo. Arguidu hatutan katak forma família ho lezada dezde 2017, iha oan ida, foin primeiravés baku lezada, di'ak malu ona to'o agora, arguidu promete sei la halo tan krime hasoru lezada ka membru família sira iha futuru no arguidu nu'udar peskadór ho rendementu kada fulan US\$ 200.00.

Enkuantu lezada deklara katak iha lokraik lezada husi Baukau mai vizita arguidu iha Manatuto no tanba rai manas lezada sei tuur iha liur no tafui kabeen nune'e arguidu nia feen primeiru hase lezada dehan "*nu'usá ó tafui kabeen mai hau*". Husi ne'e, sira diskute malu no arguidu mai no basa dala rua iha lezada nia kanuruk, tebe dala rua iha kotuk laran no tolok lezada. Lezada mós deklara katak antes ne'e arguidu la halo agresaun ruma hasoru lezada, sira di'ak malu fali ona no to'o agora la halo ona agresaun hasoru lezada. Lezada mós hatutan katak lezada sei nafatin hanesan arguidu nia feen segundu.

Alegasaun finál

Prokuradór konsidera arguidu provadu komete krime hasoru lezada maski arguidu konfesa parsialmente ba faktu sira maibé prokuradór konsidera katak arguidu nia hahalok ne'e halo lezada sente ta'uk no moe hanesan feen. Aleinde ne'e mezmu, arguidu ho lezada di'ak malu ona maibé nafatin husu ba tribunál atu kondena arguidu ho pena multa US\$60.00.

Enkuantu defeza husu ba tribunál atu aplika pena ne'ebé kmaan liu ba arguidu tanba iha produsaun ba prova sira arguidu apenas basa de'it lezada, arguidu arrepende ona nia hahalok, foin primeiravés mai hatan iha tribunál no kolabora di'ak ho justisa.

Desizaun

Depoisde avalia faktu sira hotu, tribunál prova katak basa dala rua iha lezada nia kanuruk no tebe dala rua iha kotuk laran. Tribunál mós tetu ba sirkunstánsia atenuante sira hanesan arguidu konfesa, arrepende ona ninia hahalok, foin primeiravés mai hatan iha tribunál no di'ak malu ona ho lezada. Bazeia ba prova sira no sirkunstánsia sira refere, tribunál kondena arguidu ho pena prizaun fulan neen suspende ba tinan ida.

3. Krime ofensa ba integridade física simples ho natureza violénsia doméstika

Nú. Prosesu : 0088/19. BCSIC
Kompozisaun Tribunál : Singulár
Juis : Dra. Maria Modesta de Almeida Viera
Prokuradór : Dr. Bartolomeu de Araújo
Defeza : Dr. António Fernandes
Desizaun : Pena prizaun fulan 2 suspende ba tinan 1

Iha 28 Setembru 2020, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu IXF hasoru nia feen, iha Distritu Baukau.

Akuzasaun Prokuradór

Prokuradór akuza katak iha 13 Dezembru 2019, iha oras tuku 22:00 kalan, arguidu foti bomba masa kareta nian no baku dala ida iha lezada nia liman parte loos rezulta kanek no ran. Antes ne'e, lezada haree mensagen husi feto ida tama iha arguidu nia telemóvel no lezada mós hatan mensagen ne'e katak arguidu ne'e katuas ona hafoin feto ne'e hatan fali katak *"ohh hanoin katak sei klosan"*. Ho nune'e, lezada foti bikan tuda ba kareta nia vidru no foti ai-sar kesak no baku dala rua iha arguidu nia kidun. Hafoin ne'e, arguidu komete agresau hirak ne'e hasoru lezada.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu deklara katak iha momentu ne'ebá arguidu hadia hela kareta no lezada ho hirus la'os ba mai no ko'alia hela deit kona-ba mensajen ne'ebé lezada lee iha loron ida antes iha arguidu nia telefone. Lezada mós foti bikan no tuda ba kareta nia vidru, foti ai-sar kesak baku dala ida iha arguidu nia kidun no lezada tenta atu baku tan maibé arguidu satan netik ho bomba masa kareta nian no bomba ne'e mak kona iha lezada nia liman rezulta kanek no ran nune'e la'os arguidu mak baku.

Arguidu mós deklara katak sira di'ak malu ona to'o agora no antes ne'e mós nunca baku lezada. Arguidu hatutan katak hahu forma família iha tinan 2012, foin primeiravés mai hatan iha tribunál, promete sei la halo tan krime hasoru lezada ka membru família sira iha futuru, arguidu nu'udar motorista vaskolante ho rendimentu kada fulan US\$ 200.00.

Enkuantu lezada kontinua konfirma faktu sira iha akuzasaun no deklara katak sira di'ak malu ona no to'o agora arguidu la halo ona agresau hasoru lezada. Lezada mós deklara katak antes ne'e arguidu nunca halo agresau hasoru lezada,

Alegasaun finál

Prokuradór konsidera arguidu provadu komete krime hasoru lezada nune'e husu nafatin kondena arguidu nune'e fó lisaun ba comunidade sira seluk ne'ebé hela besik ho arguidu katak mezmu sira di'ak malu ona maibé tribunál nafatin kondena arguidu tanba krime violénsia doméstika ne'e krime públiku. Ho konsiderasaun hirak ne'e, husu ba tribunál kondena arguidu ho pena prizaun fulan ida suspende ba tinan ida.

Enkuantu defeza husu ba tribunál atu aplika pena ne'ebé justu no adekua ba arguidu tanba lezada mak halo uluk agresau hasoru arguidu bainhira arguidu halo hela serbisu. Aleinde ne'e, lezada mós tenta atu baku tan arguidu maibé arguidu satan netik

ho bomba kareta nian nune'e bomba ne'e mak kona lezada nia liman. Arguidu arrepende ona niania hahalok, foin primeiravés mai hatan iha tribunál no kolabora di'ak ho justisa nune'e la difikulta tribunál nia prosesu.

Desizaun

Depoisde avalia faktu sira hotu, tribunál fiar liu lezada nia deklarasaun. Nune'e tribunál prova katak arguidu foti bomba kareta nian no baku dala ida iha lezada nia liman parte loos rezulta kanek no ran. Tribunál tetu mós sirkunstánsia atenuante sira hanesan arguidu arrepende ona niania hahalok, foin primeiravés mai hatan iha tribunál no di'ak malu ona ho lezada, nune'e bazeia ba prova sira no sirkunstánsia hirak ne'e, tribunál kondena arguidu ho pena prizaun fulan rua suspende ba tinan ida.

4. Krime ofensa ba integridade física simples ho natureza violéncia doméstika

Nú. Prosesu : 0005/19. MNLLA
Kompozisaun Tribunál : Singulár
Juis : Dra. Florencia Freitas
Prokuradór : Dr. Bartolomeu de Araújo
Defeza : Dr. Germano Guterres Ramos
Desizaun : Pena multa US\$15.00

Iha 29 Setembru 2020, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu LdS hasoru nia feen, iha Distritu Manatuto.

Akuzasaun Prokuradór

Prokuradór akuza katak iha 07 Feveireiru 2019, iha oras tuku 16:30 lokraik, arguidu buti lezada nia kakorok. Antes ne'e lezada haruka arguidu atu hasai utu iha lezada nia fuuk maibé arguidu lakohi no iha momentu ne'e kedas arguidu sai husi uma no abandona lezada to'o agora. Arguidu mós hola ona fetu seluk.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu deklara katak lezada haruka arguidu atu hasai lezada nia utu iha nia fuuk maibé arguidu lakohi tanba foin fila serbisu no sei senti kole hela. Nune'e sira diskute malu no arguidu buti lezada nia kakorok maibé husik fali de'it. Arguidu mós deklara katak to'o agora seidak hola fetu, maibé bainhira arguidu ba buka serbisu no fila ba uma, arguidu haree mane seluk hela ona ho lezada iha sira nia uma. Tanba ne'e, arguidu fila ba nia inan-aman to'o agora.

Entretantu lezada kontinua konfirma faktu sira iha akuzasaun no deklara katak sira konsege tuur hamutuk hodi rezolve problema ne'e maibé lezada mak decide moris separa ho arguidu. Kona-ba mane seluk, lezada deklara katak sira foin koñese malu no hanesan kolega de'it.

Alegasaun finál

Prokuradór haktuir katak arguidu konfesa faktu hotu iha akuzasaun no lezadu konfirma faktu sira ne'e. Nune'e, husu ba tribunál atu fó kastigu ne'ebé bele prevene arguidu nia hahalok iha futuru tanba tribunál kuaze loroloron julga mak krime violénsia doméstika. Tanba ne'e, husu ba tribunál kondena arguidu ho pena prizaun fulan rua suspende ba tinan ida.

Aleinde ne'e, defeza husu ba tribunal atu konsidera arguidu nia konfisaun inklui sirkunstánsia sira hanesan arguidu foin primeiravés mai hatan iha tribunál, arrepende ona nia hahalok, dí'ak malu ona ho lezada. Tanba ne'e, husu ba tribunál aplika pena admoestasaun ba arguidu.

Desizaun

Depoizde avalia faktu hotu, tribunál prova katak arguidu no lezada diskute malu to'o arguidu buti lezada nia kakorok. Bazeia ba faktu provadu ne'e no tetu mós sirkunstánsia sira hotu, tribunál konklui no kondena arguidu ho pena multa US\$15.00 ne'ebé arguidu sei selu US\$0.50 kada loron durante loron 30. Bainhira arguidu la selu pena multa ne'e, arguidu sei kumpri iha prizaun durante loron 40 nu'udar pena alternativa.

5. Krime ofensa ba integridade fízika simples ho natureza violénsia doméstika

Nú. Prosesu : 0139/19. BCBCV
Kompozisaun Tribunál : Singulár
Juis : Dra. Maria Modesta de Almeida Viera
Prokuradór : Dr. Bartolomeu de Araujo
Defeza : Dr. Grigório de Lima
Desizaun : Pena multa US\$ 50.00

Iha 21 Setembru 2020, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé involve arguidu AdC hasoru nia feen, iha Distritu Baukau.

Akuzasaun Prokuradór

Prokuradór akuza katak iha 15 Novembru 2019, iha oras tuku 19:00 kalan, arguidu foti ai-sar dasa uma laran nian no baku dala haat iha lezada nian liman parte loos rezulta bubu no moras. Lezada hakilar no husu ajuda ba viziñu sira no arguidu tuku dala rua iha ibun parte okos, tuku dala rua iha reen-toos no tebe dala haat iha kidan no ain kabun parte loos. Antes ne'e, lezada haruka arguidu foti ai-suak atu ke'e bee dalan tanba iha momentu udan boot no kalan ona.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak di'ak malu ona ho lezada to'o agora. Arguidu hatutan katak desde forma familia iha 2010 foin mak halo agresan hasoru lezada, foin primeiraves mai hatan iha tribunál no arrepende ona ninia hahalok. Arguidu mos dehan katak nia nu'udar dosente iha Institutu Kristal ho rendemintu kada fulan US\$ 200.00.

Aleinde ne'e, lezada kontinua konfirma faktu sira iha akuzasaun no konfirma mos ho arguidu nia deklarasaun katak depoisde akontesimentu sira di'ak malu ona no to'o agora la baku ona lezada.

Alegasaun final

Prokurador konsidera arguidu iha intensaun duni hakarak halo agresan hasoru lezada. Aleinde ne'e, arguidu nu'udar edukador no iha koñesimentu kle'an kona-ba krime ne'e nia konsekuensia maibe pelu kontrariu arguidu mak sai fali autor ba krime. Ho konsiderasaun hirak ne'e, husu ba tribunál atu kondena arguidu ho pena prizaun fulan neen suspende ba tinan ida.

Enkuantu defeza husu ba tribunál atu konsidera arguidu nia konfisaun iha produsaun ba prova sira, arrepende ona ninia hahalok, di'ak malu ona no foin primeiraves mai hatan iha tribunál. Tanba ne'e, husu ba tribunál aplika pena ne'ebé adekaudu ba arguidu.

Desizaun

Depoisde avalia faktu hotu, tribunál prova katak arguidu foti ai-sar dasa uma laran nian no baku dala haat iha lezada nian liman parte loos. Tribunál mos prova katak arguidu tuku dala rua iha lezada niaibun parte okos, tuku dala rua iha reen-toos, tebe dala haat iha kidan no ain kabun parte loos. Bazeia ba faktu provadu sira no tetu mos sirkunstansia sira hotu, tribunál kondena arguidu ho pena multa US\$50.00 ne'ebé arguidu sei selu US\$1.00 kada loraun durante loraun 50. Bainhira arguidu la selu pena multa ne'e, arguidu sei kumpri iha prizaun durante loraun 33 nu'udar pena alternativa.

6. Krime maus-tratus ba kónjuje

Nú. Prosesu	: 0012/19. BCBQI
Kompozisaun Tribunál	: Koletivu
Juis	: Dra. Jumiaty, Dra Florensia Freitas no Dr. Jose Quintão
Prokurador	: Dr. Ambrosio Rangel Freitas
Defeza	: Dr. Germano G. Ramos
Desizaun	: Pena prizaun tinan 2 suspende ba tinan 2

Iha 30 Setembru 2020, Tribunál Distritál Baukau prezide julgamentu leitura akordaun ba krime maus-tratus ba kónjuje ne'ebé envolve arguidu AdS hasoru nia feen, iha Distritu Baukau.

Akuzasaun Prokurador

Prokurador akuza katak iha 18 Setembru 2019, iha oras tuku 11:30 dadeer, arguidu partisipa iha familia nia koremetan, maibe tanba sira nia oan tanis nune'e lezada telefone ba arguidu atu fila ona mai uma. Bainhira arguidu ho motorizada fila, arguidu

hasoru lezada iha dalan. Arguidu tuun husi motorizada no tebe kedas dala ida iha lezada nia kidan, tebe dala tolu iha kotuk laran, tuku dala rua iha hasan parte loos, karuk no basa dala ida iha lezada nia kanuruk. Depoizde ida ne'e, arguidu tula fali lezada ba sira nia uma bainhira to'o uma arguidu foti fiu (*tali koplíng motor* nian) no baku lezada nia kotuk laran, buti lezada nia kakorok no riba lezada ba didin-lolon.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira iha akuzasaun no deklara katak arrepende ninia hahalok. Arguidu mós deklara katak família rua tuur hamutuk no rezolve ona problema ne'e no sira dame malu ona. Arguidu hatutan katak sira iha oan na'in tolu, foin primeiravés baku lezada, arguidu nu'udar agrikultór ho rezultadu sustenta ba nesesidade família.

Entretantu lezada mós kontinua konfirma faktu sira iha akuzasaun no deklara katak sira dame malu ona perante família rua no arguidu promete katak sei la baku tan lezada.

Alegasaun finál

Prokuradór haktuir katak tuir loloos arguidu mak kuidadu no proteze lezada hanesan nia feen, maibé pelu kontráriu arguidu mak sai fali autór ba krime. Atu halo prevensaun iha futuru nune'e arguidu la hatoman-an rezolve problema ho violénsia, husu ba tribunál kondena arguidu ho pena prizaun tinan rua fulan neen suspende ba tinan tolu.

Enkuantu defeza husu ba tribunál atu konsidera arguidu nia konfisaun hanesan depoizde akontesimentu bolu família rua no rezolve problema ne'e, di'ak malu ona no to'o agora la baku ona lezada. Aleinde ne'e, arguidu hatudu nia arrepedimentu no foin primeiravés mai hatan iha tribunál. Tanba ne'e, husu ba tribunál aplika pena admoestasaun ba arguidu.

Desizaun

Depoizde avalia faktu hotu, tribunál prova katak arguidu tebe dala ida iha lezada nia kidan, tebe dala tolu iha kotuk laran, tuku dala rua iha hasan parte loos no karuk no basa dala ida iha lezada nia kanuruk. Tribunál mós prova arguidu uza fiu (*tali koplíng motor*) no baku iha lezada nia kotuk laran, buti lezada nia kakorok no riba lezada ba didin-lolon. Bazeia ba faktu provadu sira no tetu mós sirkunstánsia sira hotu, tribunál kondena arguidu ho pena prizaun tinan rua suspende ba tinan rua.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl

info@jsmp.tl

Website: <http://jsmp.tl>